



Enfin sonda passada ha già lieu il champ da vacanzas organisà da la Lia Rumantscha.

FOTO MAD

Aventuras per uffants rumantschs da la Bassa

Entant che ils uffants en il chantun Grischun han cumenzà avant in' emna cun la scola, ha la gronda part dals uffants da la Bassa anc pudì giudair l'emna passada ina davosa emna da vacanzas. Per ils uffants rumantschs da la Bassa hai dà quest onn ina purschida speziala: in' emna champ da stad purschì da la Lia Rumantscha.

PIA PLAZ/FMR

L'idea dad in champ da stad per ils uffants da la Bassa è naschida or da discurs cun geniturs d'uffants che visitan la scola rumantscha u la canorta a Turitg. La publicitat, organisaziun e communicaziun cun ils geniturs è en mauns da la Lia Rumantscha. Il program per il champ da stad è vegni organisà e manà da differentas personas cun ina scolaziun pedagogica. La FMR ha accumpagnà ils uffants e lur manadras durant in di da lur champ.

Uffants da tut ils idioms

Igl è las nov la damaun a la staziun principala da Turitg, nua che uffants e manadras s'entaupan per ina proxima aventura. Ils uffants vegnan per part da la chapitala turitgaisa ma era dal conturn, sco questa mesemna en damaun. Il viadi maina oz a Winterthur, precis al Bruderhaus, in parc d'animals selvadis. Ils otg uffants èn l'entschatta anc in pau schenads, ma quai sa mida svelt sin la via a pe da la staziun dal bus enfin a l'entrada dal parc d'animals. Ina curta pausa a la piazza da giuglar lascha daventar ils uffants aifer curt temp buns amis, era sch'els na s'enconuschevan betg

avant. Durant la visita dals singuls animals discutan dus dals mattatschs co ch'ins numna il tschiervi, il luf-tscherver u era il portg selvadi en ils auters idioms e – tge surprisa – la differenza è minima.

Il luf turitgais

Durant brassar la liongia han ils uffants, ch'en tranter tschintg ed indesch onns, fatg ensemble termagls sur ils cunfins bilings. Naturalmente ch'i crudavan savens er frasas tudestgas. La realitat è numnadomain quella ch'ils blers uffants discurran bain rumantsch cun bab u mamma, ma già cun ils agens fragliuns è savens il tudestg la lingua dominanta.

Ils discurs rumantschs e tudestgs èn alura veginids interruts quel mument che l'emprim ha scuvri il luf. Vi e nà èn currids tut ils uffants per pudair tegnair en egl il luf.

Entant che quest animal procura plitost per lingias grassa en il Grischun, ha el fascinà ils uffants dal champ da stad. Cuntents e stanchels èn uffants e manadras pli tard puspè sa mess sin via cunter chasa. Mintgamai a las tschintg la saira vegn ditg adia a la staziun da Turitg, quella citad che vala sco il pli gronda vischnanca rumantscha.

Da la bartga enfin en il labor

La vista sin il luf è stada in dals punct culminants da questa emna rumantscha. Ils uffants han però er visità la citad da Lucerna, fatg in viadi sin il Lai da Turitg, visità il museum d'indians, experimentà en il Technorama a Winterthur e per la fin anc visità in bain puril en la Part Sura Turitgaisa. Malgrà ch'il champ ha purschì in program vast, è il dumber d'annunzias plitost stà pitschen.

In project da pilot

Conradin Klaiss, manader Furmaziun tar la Lia Rumantscha, è cuntent cun il dumber da participants. «Cunquai ch'igl è stà fitg grev da chattar ina persuna che maina il champ, avain nus pudì far fitg tard reclama. Quatras n'hant intginas famiglias betg pudì annunziar pli lur uffants.» Per Conradin Klaiss è il champ da stad 2021 in project da pilot gartegià. «Nus vulain en mintga cas cuntinuar cun il champ.» Per pudair porscher er proxim onn in program varià per ils uffants da la Bassa, ston diversas dumondas anc vegnir scleridas. Per l'ina dovrà manadras u manaders e per l'autra dovrà daners.